



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之二百三十

咸豐七年丁巳六月乙丑諭軍機大臣等扎拉芬奏阿克  
蘇安設糧臺請派員總司其事並慶英固慶倭什琿布奏請  
飭陝甘撥餉各摺片阿克蘇為南北扼要之地現在大兵進  
勦回匪自應安設糧臺以資轉運著即派海樸總司辦理現  
在內地軍務未竣需餉浩繁是以欠解甘餉為數甚鉅此次  
回匪倉猝起事一切支發斷難照從前成案辦理著該將軍  
即傳旨令海樸樽節動用毋許過事鋪張事竣之後即責成  
海樸覈實報銷一手經理現調伊犁官兵一千五百名喀喇

沙爾等處蒙古兵三千名。烏魯木齊官兵一千五百名。前往會勦。兵力已厚。著即嚴飭帶兵各員。兼程前進。迅將喀英兩城回匪。痛加勦洗。以期及早蕪事。儻有遷延觀望。貽誤事機者。即著嚴叅懲辦。至各省應解餉銀。前已諭令山西陝西山東河南。共撥銀數十萬兩。已據山西撥銀十萬兩。解赴甘肅。此外各省。本日復降旨飭催。諒必源源接濟。該將軍大臣等。於餉銀到後。務須查看各路緩急情形。均勻分撥。不准各城任意截留。將此由五百里各諭令知之。○又諭。前因喀什噶爾等處賊匪滋事。疊諭陝甘山東河南等省。籌解餉需。諒皆遵照辦理。本日據倭什琿布奏。派兵赴喀什噶爾等處策應。

並撥兵往阿克蘇防堵。其餉無款可籌。請飭陝甘總督。即措銀十萬兩解往。又據慶英等奏。各路調派官兵。約六月中齊集葉城。彼處兵餉自顧不暇。急需內地餉銀。並請飭陝甘速解數萬兩等語。現在回疆需餉孔亟。刻難緩待。樂斌諒已在甘省設法籌措。先其所急。惟該省庫項無存。全賴各省解到。方能分撥各城。現據山西王慶雲奏到。已撥銀十萬兩起解在途。此外山東省應解銀二十萬兩。尚未據奏撥。著崇恩即飭藩司籌款。陸續趕解。毋許遲延。河南省前派撥二十萬兩。雖現辦軍務。恐一時未能湊集。仍著英桂先行酌撥銀數萬兩。以資接濟。至陝西欠解甘餉。已諭曾望顏。儘先籌撥銀五萬。

兩解甘。此外如能酌量籌款。並著酌加撥解。毋誤要需。現在回疆兵力並非不足。惟餉需久絀。徵調為難。各該撫等接奉此旨。務各籌款迅速解往甘肅。以便樂斌均勻轉解各城。以資支放。俾得剋日蒞功。將此由五百里各諭令知之。○又諭御史王德固奏。請添設總兵一摺。據稱河南額設總兵二員。河北鎮在省西北。南陽鎮在省西南。其東南之歸德等處。並未設有專閫大員。歸德府為東面入省門戶。地無險阻。接壤潁。毫。蕭。碭。曹。單。向為匪徒出沒之區。僅有參將一員。難資鎮壓。現值勒擒喫緊。請添設總兵一員。其毗連歸德之光州。陳州府。各屬營伍。均歸管轄。並請將歸德原設參將一員。量移

光州。藉資策應。自為地方緊要。酌量變通起見。著英桂酌度地方形勢。及營伍兵數多寡。是否應行添設移改之處。妥議具奏。將此諭令知之。○以葉爾羌。巴爾楚克地方。勒賊出力。賞副將特克什布。守備米殿策。史珏。花翎。○丙寅。諭內閣。葉名琛奏。廣西省上屆軍政。尚未舉行。請先將已到各營辦理一摺。咸豐二年。兩廣軍政。廣西各營。因防勒土匪。未經查辦。本年又屆軍政之期。廣西勒匪現尚喫緊。若俟事竣一律補辦。實屬遲緩。著即照該督所請。將已到各營員弁。分別舉劾。先行照例題咨。聽候部議。其未到各營。准其歸入本年軍政。一律辦理。其有應行參劾之員。仍著隨時查明參辦。○諭軍

機大臣等官文。胡林翼奏。賊匪傾巢上竄。南勇敗退。賊竄蘄水一摺。據稱皖匪因年荒糧盡。裹脅饑民數十萬。由黃梅廣濟蘄州蘄水等處間道上竄。我兵分路堵擊。殺賊萬餘。南勇各營於蘄州之望天畝。追賊遇伏。營壘全失。退至蘄水等語。湖北為上游扼要。該逆意在必爭。此次南勇敗退。原因賊勢眾多所致。惟該匪裹脅饑民。不過烏合之眾。似尚不難勦散。現在胡林翼已抵黃州。收集潰勇。補製軍械。著即督率各路兵勇。迅將上竄各匪。分兵截勦。毋令蔓延。該大臣等現調水師礮船。扼守沿江。並調王鑫。劉騰鴻。由江西援勦。自因賊眾兵單。不敷調遣之故。其李孟羣一軍。本係赴援廬州。現在已

抵英山。正宜乘勝進勦。若遽行調回。則廬州當挫敗之後。困守無援。必至愈形危迫。所有李孟羣一軍。著毋庸調回。該營兵餉。已諭令福濟設法接濟矣。至大隊官兵圍攻九江小池口。正在喫緊。務須察看緩急。酌量調撥。毋得顧此失彼。致九江賊勢復張。此次斬擒賊匪。已至萬餘。南勇退敗。係因賊勢太眾。官文。胡林翼。自請議處之處。著加恩寬免。將此由六百里諭令知之。○又諭。官文。胡林翼奏。皖省賊匪傾巢竄至蘄水一摺。安徽逆匪。裹脅宿太。饑民數十萬。由黃梅廣濟蘄州等處。分路間道上竄。楚軍分路抵禦。擒斬逆匪。已至盈萬。無如賊勢太眾。南勇失利。軍壘全失。退至蘄水。胡林翼前往策

應業經收拾隊伍。分劄黃州。湖北水陸各軍。正在九江小池口。圍攻喫緊之時。今中路忽為賊斷。官文等已調李孟羣還攻蘄水。擊賊尾路。惟皖省賊氛尚熾。李孟羣已抵英山。若令折回。恐廬州更無援應。本日已諭官文等。無庸將李孟羣一軍調回。俾仍由英山前進。節節勦洗。以遏皖省賊勢。但道路梗阻。湖北不能接濟。所有該藩司一軍餉糈。著福濟源源分撥。毋令缺乏。此次皖賊由宿太等處。傾巢竄入楚境。實因皖省無兵牽制。致令該逆恣意上竄。福濟鄭魁士坐擁重兵。何得株守廬州。一籌莫展。現在逆匪全力注意楚疆。則皖境必有可乘之隙。著福濟鄭魁士迅速出兵。為擣虛攻瑕之計。毋

得專待李孟羣救援。致成坐困之勢。至安徽雖係殘破之區。賊蹤徧地。整頓較難。然地方官若得幹練之員。激勵鄉團。安良除莠。綏輯一方。即少一方之裒脅。福濟撫皖有年。於察吏安民之道。並不講求。安望軍務日有起色。務當振刷精神。力圖補救。若徒知索餉以供坐守之兵。於軍務有何裨益耶。將此由六百里諭令知之。○丁卯。諭內閣。前經疊降諭旨。飭令各路統兵大臣及各督撫。查明失守地方人員。如有聞警先逃情節。即著按律治罪。乃各省辦理未能畫一。或云先期因公出城。或云事後隨同收復。難保無避重就輕之處。茲據御史李希郊奏。江西金谿縣知縣盧開甲。署金谿縣知縣楊照

黎臨川縣知縣馬永熾。皆賊未來時。先期逃匿。以致該城失守。慘遭屠戮。此係該員在籍時所親見。今盧開甲革職後。竟未開缺。仍留軍營效力。楊照黎。馬永熾。亦未聞治罪等語。著者齡迅將盧開甲等三員失守情節。查訊明確。如有先期棄城逃避情事。即著按律治罪。毋稍徇縱。此外各路軍營。均著覈實辦理。毋得曲為開脫。博寬厚之名。而致廢弛法紀。○又諭。曾望顏奏。興安商南防兵遣撤歸伍一摺。陝西興安等處。上年因襄樊土匪擾及鄖陽一帶。調兵設防。本年武當山勦匪淨盡。業經該撫將興安府屬防兵酌撤。現在南陽土匪均已肅清。近陝地方。並皆安堵。所有商南在防兵丁。著一併撤

令歸伍。○又諭。何桂清奏。查明沙船被劫處所。應由山東巡撫查參等語。本年江浙運糧莊合順等沙船。在蘇山養馬島等處被劫。派管將弁。不能實力巡護。非尋常疏忽可比。既據該督等查明石島距江蘇洋面千里而遙。蘇山在石島之西。養馬各島。並無其名。惟有養魚池在石島之東。均係山東榮城縣管轄。著崇恩查明該管水師將弁。即行嚴參懲辦。毋稍姑容。○陝西巡撫曾望顏奏。飛蝗入境。潼關等處業已撲淨。現仍委員查勘。得旨。仍著飭屬實力撲捕。俟委員查明。即刻覆奏。○以辦理江蘇丹陽團練出力。予教諭賀芳等升敘有差。○以江南糧臺報銷遲延。知府銜陳儁等下部議處。○賞

廣東省補行乙卯科鄉試年老諸生李芹等三十六人舉人副榜有差。○戊辰諭內閣前因曾國藩以假期將滿懇請終制當經諭令假滿後即赴江西督辦軍務並仍署理兵部侍郎以資統率。原因該侍郎督勦有年楚軍正資調度墨經從戎忠孝兩全茲據奏稱江西各營安謐如常毋庸親往撫馭並瀝陳才難宏濟心抱不安仍請開缺守制各等語。曾國藩以督兵大員正當江西喫緊之際原不應遽請息肩。惟據一再陳請情詞懇切朕素知該侍郎並非畏難苟安之人著照所請准其先開兵部侍郎之缺暫行在籍守制江西如有緩急即行前赴軍營以資督率此外各路軍營設有需才之處

經朕特旨派出該侍郎不得再行瀆請致辜委任。○又諭英桂奏簡放河南及部選分發人員多未依限到省請飭部照軍務省分一律辦理一摺。河南省現在勦捕捻匪差委需員著照所請所有簡放河南及部選分發各項人員均照軍務省分新章不准捐升改捐及另行指發他省以杜規避。○諭軍機大臣等德興阿等奏何桂清咨調水師船隻歸和春等調遣並據和春將何桂清原文咨會請仍遵前旨辦理以專責成等語。德興阿和春等身膺統帥重任江南北勦賊事宜應歸該大臣等調度何桂清本非專辦軍務此次咨調泊承陞等師船歸和春等調遣原為速克鎮江起見既據和春咨

會南北夾攻。不分畛域。德興阿等即可仍遵前旨辦理。不致更形掣肘。現在籌攻鎮江。非水師不能廓清江面。況聞賊黨眾多。該逆恃為障庇。必得調集師船。先用火攻焚毀。方能直抵金山。及銀蒜等山。攻其水營。奪獲後。不獨鎮江可克。即瓜州亦在掌握中矣。據德興阿奏。張國樑已到鎮江。和春亦即日移師前往南岸。大兵業經雲集。德興阿等務當督飭各軍。水陸並舉。與和春等合力圖功。速拔堅城。待膺懋賞。朕不勝盼望之至。將此由六百里各諭令知之。○補行咸豐七年大計。江蘇卓異官九員。才力不及官一員。年老官五員。浙江卓異官十二員。不謹官二員。年老官五員。有疾官二員。河南卓

異官十一員。不謹官六員。才力不及官一員。年老官三員。分別議敘處分如例。○己巳。以內閣學士徐樹銘為兵部右侍郎。○庚午。諭內閣。宗人府奏。遵議貝子載鈞接班遲誤處分一摺。紫禁城內接班遲誤。定例甚嚴。本應照議革去貝子。惟念載鈞患病屬實。且業經病故。所有應得革爵處分。著加恩寬免。○又諭。譚廷襄奏。地方梟賊充斥。請變通從嚴懲辦一摺。直隸天津。河間。與山東毗連等屬。向多鹽梟出沒。數百為羣。每經商巡攔阻。拒捕搶劫。橫行無忌。兵役追緝。亦復此拏彼竄。若不嚴行懲辦。何以除兇暴而靖閭閻。嗣後該二府與山東毗連各屬。商巡隨同兵役緝匪。著准其攜帶鳥槍。如遇

大夥梟賊。持仗拒捕。准其格殺勿論。其尋常自行緝私。仍照舊章辦理。至地方官查拏梟賊。如遇大夥匪徒。數十人及百人以上。橫行搶劫。即照拏辦土匪之例。審明後。先行就地正法。其尋常並非大夥梟賊。及偷扒灘坨等案。仍照定例辦理。以示區別。該督即通飭各該州縣。董率團練。加派兵役。無分畛域。合力兜拏。毋任著名梟賊。得以倖逃法網。○辛未。伊犁將軍扎拉芬奏。請飛催各路援兵。赴喀英二城助剿。並力籌節省行糧。不敢泥照成案。致滋糜費。得旨。今昔情勢迥異。斷不能動云成案可循。惟在汝維持大局。勿致後難為繼也。

○壬申。遣官祭

火神廟。○諭內閣。海樸奏。阿克蘇地方擊退賊匪。請將伯克獎勵一摺。阿克蘇所屬柯爾坪地方。突有賊匪五百餘人。直撲卡倫。經該處伯克哈色木。帶領回兵前往迎擊。殺賊多名。該匪敗回。復帶兵追趕至賽林底卡倫。又斃匪十餘名。賊眾奔潰。追殺十餘里。奪獲槍矛馬匹多件。五品頂翎六品伯克哈色木。擊退賊匪。不致蔓延。尚屬奮勇可嘉。著加恩賞給四品頂帶。以示鼓勵。○阿克蘇辦事大臣海樸奏。齊蘭軍臺剿賊獲勝。並派兵防守情形。得旨。此起賊匪。究係何處來者。因何並未探明。又奏。存城防兵為數過單。勢難分撥。請將伊犁官兵一千餘名。到境時全歸領隊大臣錫拉那。帶往巴爾楚

克相機進勅批辦理甚妥○以江蘇太湖協副將周希濂為蘇松鎮總兵官署京口水師協副將李德麟為浙江定海鎮總兵官○以山東臨清勦匪出力賞守備羅奉清等升銜有差○予故江蘇蘇松鎮總兵官葉常春浙江定海鎮總兵官周士法祭葬卹廕○癸酉諭內閣譚廷襄奏遵旨招商運糧赴京懇恩免稅一摺現在譚廷襄遴派道員赴近京一帶招商販運米糧由天津通州轉運來京接濟民食所有該商等沿途經過地方著准其免稅以廣招徠仍著譚廷襄嚴查各屬如有州縣過糶及商賈把持等弊即行嚴叅懲辦○又諭麟魁等奏審明滋事兵役按律定擬一摺此案八旗披甲文

惠等因懇求變通餉項章程膽敢直入衙署毆傷官長實屬目無法紀茲據麟魁等審明定擬所有各該犯應得罪名著刑部覆覈具奏逸犯劉緒緝獲另結

東陵八旗禮部該管各官於所屬兵役平日既失於約束迨至載華等飭令查訊又未能將滋事之人迅速查出著吏兵二部查取職名分別照例議處載華端秀綿森並著交該衙門照例議處○又諭王懿德奏官軍克復秦甯縣城一摺閏五月二十一日福建提督鍾寶三統帶兵勇進攻秦甯縣賊匪該逆膽敢出撲我軍槍礮齊施斃賊一百七十餘名生擒張得仔等十一名正法餘匪尚敢抗拒鍾寶三督率各軍長

驅直進。即於二十二日。將奉甯縣城收復。此次鍾寶三親督各軍進剿。辦理尚為迅速。著即乘勝進攻。並將建甯縣城克復。所有在事出力員弁。著該督查明保奏。候朕施恩。○諭軍機大臣等。麟魁奏。請嚴催兵餉變通章程一摺。據稱東陵旗營兵役一年錢糧。向由遵化等州縣承領轉解。往返咨催。每多遲滯。嗣後請徑由承辦衙門派員赴藩庫支領。以昭簡易等語。

陵寢重地。該兵役等應得錢糧。藉資當差。非他處兵餉可比。該尚書所請變通章程。有無窒礙。著譚廷襄妥議具奏。並著督飭藩司。此項錢糧。務須按季支發。毋稍稽延。原摺著鈔給閱。

看將此諭令知之。尋奏。遵議。

東陵兵餉。請與俸折等項。均赴司庫支領。報聞。○又諭。本日據烏勒洪額文謙。錢忻和奏。派員接見俄夷。據實密陳一摺。俄夷到津。聲稱有知照理藩院公文。來津投遞。並就近等候覆信。業經烏勒洪額等派員相機開導。而該夷堅欲投文。不肯說明來意。說謊情形。已可概見。烏勒洪額等。以不難於拒之。使去。而難於去後。不再生枝節。所慮亦是。但此次委員。職分較卑。該夷恐未能深信。著派文謙親往夷船。諭以爾國公文。例由庫倫咨照理藩院辦理。天津並非該國應到之地。我等斷不敢率行接遞公文。自干冒昧之咎。惟念兩國素稱和好。

爾等遠涉重洋。來此已經數日。未便拘泥成例。所有此次來文。如果我等接收後。爾等即行回帆。聽候理藩院行知。薩納特衙門辦理。如此尚可勉強代為呈遞。理藩院查察。若欲在天津守候回文。我等既不知其中何事。實不敢接收代遞。致開辨論之端。我等實當不起。爾國與中國和好多年。豈可因投文一事。有失和睦。如此曉諭。若該夷起碇回國。即將該夷文書進呈。仍諭以此次代為投遞。已屬違例。若再至天津。斷不能照此通融辦理。儻該夷堅欲在津守候回信。即著文謙正詞拒絕。不許代為投遞。該夷雖中藏叵測。若能據理折辯。當不致遽啟釁端也。○以福建延平等處。勒賊並搜捕土匪。

出力。賞參將梁翼之。同知王澍等。花翎。主簿方三典等。藍翎。並在籍員外郎郭柏蔭等。升敘有差。○以福建汀州失守。革都司賈彭。守備楊鳳元。千總陳玉銓。嚴益彪。職。並連問。○以失守城池。即行克復。革福建清流縣知縣曹紹曾。歸化縣知縣韋侃。遊擊張常經。職。仍令幫同防堵。○以直隸永定河漫溢。革道員崇厚。都司張淳。外委司際奉。職。仍留任。同知李載蘇。州同程志達。革職留工效力。署總督譚廷襄。下部議處。○甲戌。

上詣清夏齋問

如皇貴太妃安。○諭內閣。現在記名水師總兵人員。將次用竣。

著兩江閩浙兩廣總督於水師副將內遴選堪勝水師總兵者各保奏數員迅速送部引見候旨記名以備簡用不得以無員可保一奏塞責其水師參將遊擊都司守備各員如有材藝出眾可備器使者並著覈實開單具奏○又諭王懿德奏官軍克復建甯縣城一摺閏五月二十六等日福建提督鍾寶三統帶官兵進攻建甯縣賊匪該逆紛撲抗拒守備陳韶舞手刃執旗賊目一名把總汪士忠矛刺悍賊數名各軍槍礮齊施殲斃逆匪數十名該逆紛紛退逃自相踐踏餘匪奔竄入城兵勇奮力圍攻轟斃城上賊匪多名大軍繼進斃賊一百餘名生擒李長奎等八名正法奪獲大礮火藥器械

甚多當將縣城收復餘匪由北門竄逃經聯甲壯丁窮追斬馘不計其數副將林策勳等分路搜捕均有斬獲現在邵武府屬各縣均已一律肅清勦辦尚為迅速著鍾寶三乘此聲威會攻甯化縣城剋期收復盡殲醜類毋留餘孽其在事出力員弁兵勇著該督查明彙案保奏○以福建順昌勦賊出力免已革守備李呈瑞治罪○乙亥諭內閣昨據御史毛昶熙奏叅步軍統領聯順徇私廢法各款當令左都御史肅順面傳諭旨令將所叅劣蹟據實詳奏本日復據該御史奏稱已革筆帖式慶陽係聯順親戚今在步軍統領衙門影射辦事攬權納賄廣置房產上年做壽演戲五營將備齊往慶賀

營汛為之一空。其為聯順腹心。縱容舞弊。已有實據。著派端華。僧格林沁。即將慶陽拏獲。會同刑部審訊。慶陽家產。並著端華等嚴密查封。至所叅聯順得受營規。堆撥兵役。每多缺額等款。著一併查明具奏。聯順著先開步軍統領之缺。聽候查辦。○又諭。恆春。桑春榮奏。回匪竄至省垣。現籌勒辦情形。自請嚴議一摺。曲江回匪。勾結激江等處回夷。竄至省垣。城外肆行焚殺。該督撫身膺疆寄。未能先事豫防。咎有應得。除恆春業經身故。加恩寬免外。雲南巡撫桑春榮。及在省司道等。均著交部嚴加議處。○又諭。舒興阿。桑春榮奏。督臣憤急自盡一摺。覽奏殊堪駭異。雲貴總督恆春。數歷中外。平日辦

事尚屬認真。現因回匪逼近省城。雖事處危急。而城池並未失陷。該督自應力籌堵剿。乃甫經具摺自請嚴議。旋於六月初一日夜。與其妻博禹特氏。在署自縊。封疆大吏。當時事艱難之際。不思力圖挽救。輒以一死卸責。不惟無益國事。抑且貽誤大局。死出無名。與效命疆場者。不可同日而語。惟覽其遺摺。因堵截計窮。自怨誤國殃民。一死不足蔽辜。且惓惓以國計民生為念。無一語涉及家事。其情亦甚可憫。所有該督自請嚴議之處。著加恩寬免。仍無庸給予卹典。以昭平允。○又諭。黃琮等奏。辦理團練無效。請交部嚴加議處一摺。前任兵部侍郎黃琮。江西道監察御史竇埤。廣西左江鎮總兵周

鳳岐。辦理團練。因回匪猝至。未能抵禦。致撲省城。均屬咎有應得。惟該員等俱係紳士。與地方官究屬有間。黃琮。竇圻。周鳳岐。均著加恩。改為交部議處。○諭軍機大臣等。本日據恆春。桑春榮奏。曲江回匪。勾結回夷。竄及省垣。請飭撥兵餉。復據舒興阿。桑春榮奏。督臣恆春。事急自盡。聞之不勝駭異。雲貴總督一缺。現辦軍務。甚為緊要。已降旨著吳振棫調補。即赴新任。毋庸來京請訓矣。川省接壤滇疆。現在大理尚未克復。全滇官兵。半經外調。臨安府屬曲江回匪。復勾結澂江等處回夷。潛至呈貢縣。糾聚數千人。衝散團練。徧及省城。現在桑春榮等籌畫守禦。兵餉均缺。吳振棫著再於川省挑撥精

兵二千名。親自督帶赴滇。並在川籌撥餉銀五萬兩。迅速委解。為接濟軍需之用。毋得遲延致誤。四川總督印務。即交藩司祥奎護理。雲南回匪滋事。已閱年餘。其始由地方官區分漢回之見。不能秉公剖辦。及至勢成燎原。復未能分別良莠。勦撫兼施。以致回匪猶蓄異志。常謂漢人欺回。日事報復。此次恆春等呈遞該回偽示。歸咎於劣紳欺陵。大吏偏袒。覽其措詞。尚未敢公然背叛。吳振棫於雲南情形。頗能熟悉。經朕委以艱鉅重任。務即先行出示。剴切曉諭。但分良莠。不分漢回。俾先聲奪人。解散黨與。到滇後。恩威並用。示以通權達變之方。不為浮言所惑。方能帖服人心。挽回大局。該督閱歷已

深辦事素有把握。此中操縱機宜。著即悉心籌辦。該回偽示。並著發給閱看。再新授湖南臬司徐之銘。籍隸貴州。於滇省回務情形。尚為熟悉。茲已調任雲南臬司。俾該督得收指臂之助。將此由六百里諭令知之。○又諭。曲江回匪。勾結潞江回夷。至省垣焚殺。狂悖已極。惟據恆春將該回民偽示。咨送軍機處。朕覽其詞意。尚未敢自居於叛逆。總以漢匪叛逆。有據為詞。可見前次辦理。總未得其平。以致回民有所藉口。桑春榮已補授巡撫。本日復調吳振棫為雲貴總督。並諭令由四川帶兵二千名。餉銀五萬兩。馳往滇省相機辦理。未到任以前。雲貴總督印務。著桑春榮暫行兼署。恆春所調各兵。諒

已到省。務當督飭文武各員。實力堵勦。毋稍疏懈。漢回皆係滇省百姓。辦理之法。但須分別良莠。不可歧視。漢回皆係意剴切曉諭。俾知官兵勦辦。毫無偏袒。庶幾知感知悔。可以解散其黨。吳振棫到任後。該撫即會同籌辦軍務。毋庸來京請訓。將此由六百里諭令知之。○以工部尚書文彩兼步軍統領。○調四川總督吳振棫為雲貴總督。以山西巡撫王慶雲為四川總督。山西布政使恆福為巡撫。大理寺卿常績為山西布政使。調湖南按察使徐之銘為雲南按察使。雲南按察使毓科為湖南按察使。○以辦理貴州威甯回務出力。賞鹽運使福連等。加銜升擢有差。○予貴州都勻殉難訓導魏

中榮並委員計遠長妾唐氏等六十二名口旌卹如例○予  
貴州麻哈等處陣亡殉難千總卞鳴珂黃金貴張永泰雷新  
霆裴永昌把總馬順興莊繼唐劉光德王朝龍梁開泗許世  
魁陳國清謝占魁外委彭玉順李光增鄒世福宣明饒萬興  
蔣安邦鄭先榮黃啟雲方文玉汪湛恩秦元興郭應奎龐瑞  
蘭廖連升從九品李毓芳楊旭光訓導黃錕祭葬世職黃錕  
子河昶河清媳李氏王氏孫高高文生陳際昌等旌卹如例  
○丙子諭內閣端華僧格林沁奏遵旨查封慶陽家產查有  
私存彙案各件有乖體制等語向例各衙門彙案均應收存  
官所何以已革筆帖式慶陽寓所存有步軍統領衙門彙案

及各項報單著聯順明白回奏○又諭奕格等奏葉爾羌糧  
餉章京應追虧款可否查封家產備抵一摺前據慶英等奏  
葉爾羌糧餉章京奎齡糧餉帳目查有虧短情弊請旨革職  
嚴追查封備抵業經批令該部議奏所有該員旗籍家產即  
著該旗查封備抵○又諭著齡奏官軍克復龍泉縣城敗匪  
殲除淨盡一摺五月二十七等日已革副將周鳳山督兵環  
攻龍泉縣城屢有斬擒閏五月二十五日渡濠環擊投誠賊  
目內應各勇緣梯登城逆匪猶拌死巷戰兵勇分投兜殺共  
殲斃三千餘人奪獲軍械一千餘件當將縣城克復在事出  
力人員著該撫查明擇尤保奏○又諭著齡奏進勦永豐各

股匪徒。疊次獲勝一摺。候補道王鑫帶兵馳抵永豐。在沙溪等處追殺竄匪。生擒賊首。前據駱秉章奏報。已降旨分別獎卹。茲復據者齡奏稱。五月二十一日。王鑫由沙溪追賊至韶源地方。焚毀賊營。通計斃賊二千餘名。生擒數百名。其吉安賊匪屢次出撲。均經知府趙煥聯等擊敗。萬安敗匪亦經水師截擊。礮斃無算。此次在事出力各員。著者齡擇尤請獎。諭軍機大臣等。曾國藩援勦江西之師。多係楚勇。素稱得力。茲據給事中李鶴年奏。該勇自曾國藩回籍後。漸忘紀律。頗有滋擾情事。此項楚勇。現歸何人管帶。著福興者齡查明。如有滋擾情形。即飭帶兵之員。妥為約束。無令滋事。前據官文

奏。安徽逆匪分股上竄。南勇失利。已檄調王鑫一軍。回楚應援。但王鑫現在吉安。勦匪頗屬得力。如今赴楚。何人可以接管。或因吉安正當喫緊。即將王鑫暫留江西。俟克復吉安。再令前往湖北。著福興者齡斟酌辦理。至福興前奏。派李定太帶兵。由萬年樂平一路。進勦饒屬踞匪。該將軍即由貴溪弋陽前進。以為後路聲援。現在福建連克城池。撫建賊勢稍衰。福興正可督兵節節進勦。如能會合閩兵。不難痛殲醜類。規復撫建二城。著福興體察情形。相機辦理。毋得遷延貽誤。將此由五百里諭令知之。○以克復江西龍泉縣城。復已革副將周鳳山職。賞還花翎。○予江西龍泉等處陣亡把總楊士

遂。胡文應。武明秀。外委劉之益。祭葬世職。○丁丑。

上詣

大高殿。行禮。○還宮。○諭內閣。曾望顏。奏參疏防流民入境之  
州縣。請分別議處一摺。陝西商州知州劉良駟。雒南縣知縣  
邵玉琳。於各起流民入境。並不查截咨送回籍。任令散往各  
屬。難保無匪徒溷跡其中。實非尋常疏忽可比。劉良駟。邵玉  
琳。著交部分別議處。儻再不留心防察。即著嚴參懲辦。○  
上以孟秋時享。

太廟。自是日始。齋戒三日。○戊寅。諭內閣。英桂奏。豫省軍政。未  
能依期舉行。懇仍俟軍務告竣。辦理一摺。河南省上屆軍政。

因各營調防。未經查辦。本年又屆軍政之期。該撫現駐潁郡。  
辦理堵勒事宜。各營將備。亦多徵調。或分守要隘。自未便紛  
紛調驗。所有咸豐七年豫省軍政。著准其展限。俟軍務告竣。  
再行辦理。仍著該撫隨時察看。儻有廢弛不職之員。即行參  
劾。毋稍遷就。○又諭。和春奏。圍攻鎮江。逆匪獲勝一摺。自溧  
水句容相繼克復後。經和春等督飭各軍移營。規復鎮江府  
城。張國樑率同虎嵩林等。連日劄營。備進。六月十一日。銀臺  
山賊。疊出七八千人。分路撲來。都司周顯親等迎擊。斃賊數  
十。該逆恃眾抵拒。張國樑率領副將李若珠等接戰。復斃多  
名。張國樑揮令李若珠等左右夾攻。周天培。馮子材等。從後

抄擊斃賊不計其數。並擊倒黃衣悍賊數名。乘勝追擊。該逆猶敢剽駐山梁。槍礮回抗。我軍冒煙搶上。斃賊甚眾。餘皆敗逃。甘露寺金山等處。復出賊千餘來援。余萬清、虎嵩林等督兵分途截勦。總兵泊承陞等亦督水軍攻打甘露寺賊營。逆勢大敗。狂奔。官軍追殺至城西門。該逆滾崖落澗死者不計其數。統計是日斃賊六七百名。砍取首級五十餘顆。奪獲旗幟軍械二百餘件。逆匪踞守鎮江。死力抗拒。我軍既已移營進勦。獲勝。著和春、張國樑速即乘機力圖克復。並飭南北岸水路各軍併力攻取。毋稍延玩。○諭軍機大臣等。有人奏侍衛蘊秀帶兵不能得力。候選知縣於學琴隨營當差。恃勢陵

人。不自檢束。聲名平常等語。蘊秀在揚州軍營。曾經德興阿等保奏。賞給副都統銜。該侍衛帶兵打仗。究竟能否奮勇。著德興阿、翁同書、秉公確查。如果該侍衛在營不能得力。即據實具奏。再降諭旨。至候選知縣於學琴。既據奏稱聲名平常。難免有藉勢招搖情事。此等劣員。留於軍營。殊無裨益。並著德興阿等確切查明。即行斥退。不准留營。致滋貽誤。再已革兩淮鹽運使劉良駒。在揚州軍營。辦理文案。朕聞其繕寫奏報。每致蒙混。該大臣等增添情節。劉良駒本係獲罪之員。輒敢於軍情重務。私自增改。實屬膽大妄為。著該大臣等詳細查明。據實參奏。毋稍徇隱。此外差委各員。並著隨時查看。覈

實甄劾。並迅督兵勇克復瓜州。毋得日事遷延。致負委任。將此由六百里諭令知之。○命三品頂帶已革江蘇巡撫許乃釗。赴欽差大臣和春軍營。幫辦軍務。賞已革山東巡撫張亮基。五品頂帶。幫辦雲南勦匪事宜。○命貴州按察使潘楷。來京。以兩淮鹽運使福連。為貴州按察使。○予江南鎮江陣亡都司周顯親。祭葬世職。

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之二百三十



